

南
北
史
合
注

欽定四庫全書

南北史合注卷一百八十八

明李清撰

北史一百二

柔然姓郁久閭氏始神元末掠騎有得一奴髮始齊眉
忘本姓名其主字之曰木骨閭木骨閭者首禿也木骨

閭與郁久閭聲相近故子孫因為氏木骨閭既壯免奴
為騎卒穆帝時坐後期當斬亡匿廣漢谿谷間收合逋
逃得百餘人依純突隣部木骨閭卒子車鹿會雄健始
有部衆自號柔然後太武以其無知狀類於虫故改號
蠕蠕車鹿會既為部帥歲貢馬畜貂豹皮冬則徙渡漠
南夏則還居漠北車鹿會卒子吐奴傀立吐奴傀卒子
跋提立跋提卒子地粟袁立地粟袁卒其部分為二地
粟袁長子匹候跋繼父居東邊次子緼紇提別居西邊

及昭成殂，緼紇提附衛辰，貳於魏。魏登國中討之，柔然
移部適走，追之及於大磧南牀山下。大破之，虜其半部。
匹候跋及部帥屋擊各收餘落，適走。遣長孫嵩及長孫
肥追之。度磧嵩至平望川，大破屋擊擒之，斬以徇。肥至
涿邪山，追及匹候跋，跋舉部落請降。獲緼紇提子曷多
汗及曷多汗兄詰歸之。社論斛律等并宗黨數百人，分
配諸部。緼紇提復降，道武撫慰如舊。九年，曷多汗與社
論率部衆桑其父西走，長孫肥輕騎追之，至上郡跋那。

山斬曷多汗盡陸其衆僅社論數人奔匹侯跋匹侯跋處之南部去其庭五百里令其子四人監之既而社論率其私屬執匹侯跋四子而叛襲匹侯跋諸子收餘衆亡依高車斛律部社論克狻有權變月餘乃釋匹侯跋歸其諸子欲聚而殲之密舉兵襲殺匹侯跋其子啟跋吳頡等十五人歸於道武社論既殺匹侯跋懼王師討之乃掠五原以西諸部北渡大漠道武以拔頡為安遠將軍平棘侯社論與秦王姚興和親道武遣材官將軍

和突襲黠弗素古延諸部社崙遣騎救素古延突逆擊
破之社崙遠遁漠北侵高車深入其地遂并諸部凶勢
益振北徙弱水始立軍法千人為軍軍置將一人百人
為幢幢置帥一人先登者賜以虜獲退懦者以石擊首
殺之或臨時極捷無文記將帥以羊屎粗計兵數後頗
知刻木為記其西北有匈奴餘種國尤富彊帥曰拔也
稽舉兵襲社崙社崙逆戰於頰根河大破之後盡為社
崙所并號為彊盛隨水草畜牧西則焉耆之地東則朝

鮮之地北則渡沙漠窮瀚海南則臨大磧其常所會庭
則燉煌張掖之北小國皆苦其扈抄羈縻附之於是自
號邱豆代可汗邱豆代猶魏言駕馭開張也可汗猶魏
言皇帝也柔然之俗君及大臣因其行能即為稱號若
中國立謚既死不復追稱道武謂尚書崔宏曰蠕蠕之
人昔號頑嚚每來抄掠駕牒牛奔適驅健牛隨之牒牛
伏不能前異部人有教其以健牛易之者蠕蠕曰毋尚
不能行而况其子終不易遂為敵所虜今社論學中國

立法置戰陣卒成邊害道家言聖人生大道起信矣天
興五年社崙聞道武征秦姚興遂犯塞入自參合陂南
至豺山及善無北澤時遣常山王遵以萬騎追之不及
天賜中社崙從弟悅代大那等謀殺社崙而立大那發
覺大那等來奔以大那為冠軍將軍西平侯悅代為越
騎校尉易陽子三年夏社崙寇邊永興元年冬又犯塞
二年明元討之社崙遁走道卒其子度拔年少未能御
衆部落立社崙弟斛律號藹若蓋可汗魏言資質美好

也斛律北并賀術也骨國東破譬歷辰部落三年斛律宗人悅侯咄觚干等數百人來降斛律畏威自守不敢南侵北邊安靜神瑞元年與燕王馮跋和親跋聘斛律女為妻將為交婚斛律長兄子步鹿真謂斛律曰女小遠適憂思生疾可遣大臣樹黎勿地延等女為媵斛律不許步鹿真出謂樹黎等曰斛律欲令汝女為媵遠至他國樹黎遂共結謀令武士夜就斛律穹廬伺其出執之與女俱嬪於和龍乃立步鹿真步鹿真立委政樹黎

初高車叱洛侯者叛其渠帥導社論破諸部落社論德
之以為大人步鹿真與社論子社拔共至叱洛侯家淫
其少妻少妻告步鹿真叱洛侯欲奉大檀為主遺大檀
金馬勒為信步鹿真聞之歸發八千騎往圍叱洛侯叱
洛侯焚其珍寶自刎死步鹿真遂掩大檀大檀發軍執
步鹿真及社跋絞殺之乃自立大檀者社論季父僕渾
之子先統別部鎮於西界能得衆心國人推戴之號牟
汗紇升蓋可汗魏言制勝也斛律父子既至和龍馮跋

封為上谷侯大檀率衆南徙犯塞明元親討之大檀懼而遁遣山陽侯奚斤等追之遇寒雪士衆凍死及墮指者十二三明元崩太武即位大檀聞而大喜始光元年秋乃寇雲中太武親討之三日二夜至雲中大檀騎圍太武五十餘重騎逼馬首相次如堵士卒太懼太武顏色自若衆情乃安先是太武弟大那與社論爭國敗而來奔大檀以大那子於陟斤為部帥軍士射於陟斤殺之大檀恐乃還二年太武大舉征之東西五道並進平

陽王長孫翰等從黑漠間汝陰公長孫道生從白黑兩
漠間駕從中道東平公城青次西從栗園宜城王奚斤
將軍安原等西道從爾寒山諸軍至漠南舍輜重輕騎
齋十五日糧絕漠討之大檀部落驚駭北走神麇元年
八月大檀遣子將騎萬餘入塞殺掠邊人而走附國高
車追擊破之自廣寧還追之不及二年四月太武練兵
南郊將襲大檀公卿大臣皆不欲術士張淵徐辯以天
文止帝帝從崔浩計而行會江南使還稱宋文欲犯河

南謂行人曰汝疾還告魏王歸我河南地即當罷兵不然盡我將士之力帝聞而大笈告公卿曰龜鱉小豎自救不暇其何能為就使能來若不先滅蠕蠕便是坐待寇至腹皆受敵非上策也吾行決矣於是駕出東道向黑山平陽王長孫翰從西道向大娥山同會賊庭五月次沙漠南舍輜重輕騎襲之至粟水大檀衆西奔弟匹黎先典東落將赴大檀遇翰軍翰縱騎襲之殺其大人數百大檀聞之震怖與其族黨焚廬舍絕迹西走莫知所

至於是國落四散窟伏山谷畜產布野無人收視太武緣粟水西行過漠將竇憲故壘六月駕次菟園水去平城三千七百餘里分軍搜討東至瀚海西接張掖水北度燕然山東西五千餘里南北三千里高車諸部殺大檀種類前後歸降三十餘萬俘獲首虜及戎馬百餘萬匹八月太武聞東部高車屯已尼陂民畜甚衆去官軍千餘里遣左僕射安原等往討之暨已尼陂高車諸部望軍降者數十萬大檀部落衰弱因發疾卒子吳提立

號敕連可汗魏言神聖也四年遣使朝獻先是北部侯
騎獲吳提南徧邏者二十餘人太武賜之衣服遣歸吳
提上下感德故朝貢帝厚賓其使遣之延和三年二月
以吳提尚西海公主又遣使者納吳提妹為夫人進左
昭儀吳提遣其兄禿鹿傀及左右數百人來朝獻馬二
千匹帝大悅班賜甚厚至大延二年乃絕和犯塞四年
駕幸五原遂征之樂平王丕河東公賀多羅督十五將
出東道永昌王健宜都王穆壽督十五將出西道駕出

中道至浚稽山分中道復為二道陳留王崇從六澤向
涿邪山駕從浚稽北向天山西登白阜刻石記行不見
柔然而還時漠北大旱無水草軍馬多死五年駕西伐
沮渠牧犍宜都王穆壽輔景穆居守長樂王嵇敬建寧
王崇二萬人鎮漠南以備柔然吳提果犯塞壽素不設
備賊至七介山京邑大駭爭奔中城司空長孫道生拒
之吐頽山吳提之寇也留其凡乞列歸與北鎮諸軍相
守敬崇等破乞列歸於陰山之北獲乞列歸歎曰沮渠

臨我也獲其伯父他吾無鹿胡及其將帥五百人斬首
萬餘級吳提聞而適道生追之至漠南而還真君四年
駕幸漠南分軍為四道樂安王範建寧王崇各統十五
將出東道樂平王督十五將出西道駕出中道中山王
辰領十五將為中軍後繼駕至鹿渾谷與賊相遇吳提
適追至頰根河擊破之駕至石水還五年復幸漠南欲
襲吳提吳提遠適乃止吳提卒子吐賀真立號處可汗
魏言唯也十年正月駕北伐高昌王那出東道洛陽王

羯兒出西道駕與景務自中道出涿祁山吐賀真別部
帥爾綿他拔等

魏內八諸姓有爾綿氏孝文改綿氏

率千餘家來降是時軍行數千里吐賀真新立恐懼遠
遁九月駕北伐高昌王那出東道略陽王羯兒出中道
與諸軍期會於地弗池吐賀真悉國精銳軍資甚盛圍
那數十里那掘長圍堅守相持數日吐賀真數挑戰輒
不利以那衆少而固疑大軍將至解圍夜遁那引軍追

之九日九夜吐賀真益懼棄輜重踰穿隆嶺遠遁那收
其輜重引軍還與駕會廣澤略陽王羯兒盡收其民戶
畜產百餘萬自是吐賀真單弱遠竄邊疆息警矣太安
四年駕北征騎十萬車十五萬兩旌旗千里遂渡大漠
吐賀真遠遁其莫弗烏朱駕頽率衆數千落來降乃刊
石記功而還太武征伐後意在休息柔然亦佈威北竄
不敢復南和平五年吐賀真卒子子成立號受羅部真
可汗魏言惠也自稱永康元年率部侵塞北鎮遊軍大

破其衆皇興四年子成犯塞駕北討京兆王子推東陽
公元丕督諸軍出西道任城王雲等督軍出東道汝陰
王賜濟南公羅為拔督軍為前鋒隴西王源賀督諸軍
為後繼諸將會駕於女水之濱獻文親誓衆詔諸將曰
用兵在奇不在衆卿等但為朕力戰方畧已在朕心乃
選精兵五千人挑戰多設奇兵惑之虜衆奔潰逐北三
十餘里斬首五萬級降者萬餘人戎馬器械不可稱計
旬有九日往反六十餘里攻女水曰武川遂作北征頌

刊石記功延興五年予成求通婚娉有司以予成數犯邊塞請絕其使發兵討之帝曰蠕蠕譬若禽獸貪而亡義朕當以信誠待物不可抑絕也予成知悔前非遣使請和求結姻援安可孤其款意乃詔報曰所論婚事今始一及尋覽事理未允厥中夫男而下女文象所明初婚之吉敦崇禮聘君子所以重人倫之本不敬其初令終難以保矣予成每懷譎詐終獻文世更不求婚太和元年四月遣莫何去汾比拔等來獻良馬貂裘比拔等

求觀天朝珍寶敕有司出御府珍玩金玉文繡器物御
厩文馬奇禽異獸及民間所宜用者列之京肆比拔厯
觀之相謂曰大國富麗一生所未見也二年二月又遣
比拔等朝貢尋請婚孝文志在招納許之予成雖歲貢
不絕而款約不着婚事亦停九年予成死之豆崙立號
伏古敦可汗魏言恒也自稱太平元年豆崙殘暴好殺
其名臣侯鑿堊石洛侯數忠言諫之又勸與魏通和勿
侵中國豆崙怒誣石洛侯謀反殺之夷其三族十六年

八月孝文遣陽平王頤左僕射陸叡並為都督領軍斛律桓等十二將七萬騎討豆崙部內高車阿伏至羅率眾十餘萬西走自立為主豆崙與叔父那蓋為二道追之豆崙出自浚稽山北而西那蓋出自金山豆崙頻為阿伏至羅所敗那蓋累有勝捷國人咸以那蓋天助欲推那蓋為主那蓋不從眾彊那蓋曰我為臣不可安能為主眾乃殺豆崙母子以尸示那蓋乃襲位那蓋號侯其伏代庫者可汗魏言悅樂也自稱太安元年那蓋死

子伏圖立號他汗可汗魏言緒也自稱始平元年正始
三年伏圖遣使紇奚勿六跋朝獻

魏內入諸姓有紇奚氏孝文改稽氏

請求通和宣武不報其使詔有司敕勿六跋曰蠕蠕遠
祖社喻是大魏叛臣往者包容暫時通使今蠕蠕衰微
有損疇日大魏之德方隆周漢跨據中原指清八表正
以江南未平權寬北畧通和之事未容相許若修藩禮
款誠昭著當不孤爾也永平元年伏圖又遣勿六跋奉

函書一封并獻貂裘宣武不納依前喻遣伏圖西征高車為高車王彌俄突所殺子醜奴立號亘盧伏跋亘伐可汗魏言彰制也自稱建昌元年永平四年九月醜奴遣沙門洪宣奉獻珠像延昌二年冬宣武遣驍騎將軍馬義舒使於醜奴未發崩事遂停寢醜奴壯健善用兵四年遣使侯斤尉比建朝貢熙平元年西征高車破之擒其主彌俄突殺之盡并叛者國遂殫盛二年又遣使侯斤尉比建統奚勿六跋鞏顧禮等朝貢神龜元年二

月孝明臨顯陽殿引顧禮等二十人於殿下遣中書舍人徐紘宣詔讓以藩禮不備初豆噲死那蓋為主伏圖納豆噲之妻侯呂陵氏生醜奴阿那瓌等六人醜奴立侯忽亡一子祖惠求募不能得有尼引副升牟妻是豆渾地萬年二十許為暨巫假託神鬼先常為醜奴所信出入去來乃言此兒今在天上我能呼得醜奴母子欣悅後歲仲秋在大澤中施帳屋齋潔七日祈請天神經一宿祖惠忽在帳中自云恒在天上醜奴母子抱之悲

喜大會國人號地萬為聖女納為可賀敷授夫副升牟
爵位賜牛馬羊三千頭地萬挾左道兼有色醜奴甚加
重愛信用其言亂國政如是積歲祖惠年長其母問之
祖惠言我恒在地萬家上天者地萬教也其母具以狀
告醜奴醜奴言地萬懸鑒遠事不可不信勿用讒言也
既而地萬恐譖祖惠於醜奴醜奴陰殺之正光初醜奴
母遣莫何去汾李具列等絞殺地萬醜奴怒欲誅具列
等又阿至羅侵醜奴醜奴擊之軍敗還為母與其大臣

所殺立醜奴弟阿那瓌為主阿那瓌立經十日其族兄
俟力發示發率衆數萬伐阿那瓌阿那瓌戰敗將弟
居伐輕騎南走魏阿那瓌母等呂陵氏及其二弟尋為
示發所殺而阿那瓌未知也九月阿那瓌將至孝明遣
兼侍中陸希道為使主兼散騎常侍孟威為使副迎勞
近畿使司空公京兆王繼至北中侍中崔光黃門郎元
纂在近郊並申宴勞引至闕下孝明臨顯陽殿引從五
品已上清官皇宗藩國使客等列於殿庭王公以下及

阿那瓌等入就庭中北面位定謁者引王公以下升殿
阿那瓌位藩王下又引將命之官及阿那瓌弟并二叔
位於羣官下遣中書舍人曹道宣詔勞問阿那瓌啟云
陛下優隆命臣弟叔等升殿預會但臣有從兄在北之
日官高二叔乞命升殿詔聽之乃列於阿那瓌弟之下
二叔之上宴將罷阿那瓌求詣帝前詔引之阿那瓌再
拜跪曰臣先世緣由出於大魏詔曰朕已具知阿那瓌
起言曰臣之先逐草放牧遂居漠北詔曰可具陳之阿

那瓌又言曰臣祖先已來世居北土雖隔越山津乃恭
心募化所以未能時宣者正以高車悖逆臣國擾攘不
暇遣使宣城自頃年已前漸定高車及臣兄為主故遣
使鞏顧禮等使大魏實欲虔修藩禮是以曹道芝北使
之日臣與主兄即遣大臣五人拜受詔命臣兄弟本心
未及上徹但高車從而侵暴中有姦臣因亂作逆殺臣
兄立臣為主裁過旬日臣以陛下恩慈如入故倉猝輕
身投國歸命陛下詔曰卿所陳猶未盡可更言之阿那

瓌再拜受詔起言曰臣以家難輕來投闕老母在彼萬里分張本國臣民皆以逆散陛下隆恩有過天地求乞兵馬還向本國剪叛收亡陛下慈念賜借兵馬老母若在得生相見以申母子之恩如其死也即得報讐以雪大恥臣當統臨餘民奉事陛下四時之貢不敢闕絕陛下聖顏難覩敢有披陳但所欲言者口不能盡言別有辭啟仰呈仍以啟付舍人常景具奏尋封阿那瓌朔方郡公柔然主賜以衣冕加之軺蓋祿從儀威同於戚藩

伽藍記曰處之燕然館賜宅歸得里

十二月孝明以阿那瓌國無定主思還綏集啓請切至
詔議之時朝臣意有同異或言聽還或言不可領軍元
乂為宰相阿那瓌私以金百斤貨之遂歸北二年正月
那那瓌等五十四人請辭孝明臨西堂引見阿那瓌及
其伯叔兄弟五人升階賜坐遣中書舍人穆弼宣勞阿
那瓌等拜辭詔賜細明光人馬鎧二具鐵人馬鎧六具
露絲銀纏梁二張并白牝赤漆梁十張并白牝黑漆梁

十張并藩露絲弓二張并箭朱漆柘弓六張并箭黑漆
弓十張并箭赤漆楯六楯并刀黑漆楯六楯并刀赤漆
鼓角二十具五色錦被二領黃紬被褥三十具私府繡
袍一領并帽內者緋納襖一領緋袍二十領并帽內者
綵綵千段緋納小口袴褶一具內中宛具紫納大口袴
褶一具內中宛具百子帳十八具黃布幕六張新乾飯
一百石麥麩八石榛麩五石銅烏鎗四枚柔鐵烏鎗四
枚各受二斛黑漆竹楹四枚各受五升婢二石父草馬

五百疋馳百二十頭犝牛一百頭羊五千口朱畫盤器
十合粟二十萬石至鎮給之詔侍中崔光黃門元纂郭
外勞遣阿那瓌來奔後其父兄僕力發婆羅門率數萬
人入討示發破之示發奔走地亘千為其所殺推婆羅
門為主號彌偶可杜旬可汗魏言安靜也時安北將軍
懷朔鎮將楊鈞表其事且言彼已立主是阿那瓌同堂
兄弟夷人獸心已相君長恐未肯以殺兄之人郊迎其
弟輕往虛反徒損國威自非廣加兵衆無以送其入北

二月孝明詔舊經柔然使者牒云具仁

魏內入諸姓牒云氏孝文改云氏

往喻婆羅門迎阿那瓌復藩之意婆羅門殊驕慢無遜
避心責具仁禮敬具仁執節不屈婆羅門遣大官莫何
去汾侯斤邱升頭六人將二千隨具仁迎阿那瓌五月
具仁還鎮論彼事勢阿那瓌慮不敢入表求還京會婆
羅門為高車所逐率十部落詣涼州歸降於是柔然數
萬相率迎阿那瓌七月阿那瓌啟云投化柔然元退社

渾河梅等二人

魏內八諸姓谷渾氏孝文改渾氏

以今月二十六日到鎮云國土大亂姓別住迭相抄掠當今北人鵠望待極今亡依前恩賜給精兵一萬還令督率送臣殲北撫定荒人脫蒙所請事必克濟詔付尚書門下博議八月詔兼散騎常侍王遵業馳駟宣旨慰諭那那瓌并申賜賚九月柔然後主俟匿伐來奔懷朔鎮阿那瓌兄也列稱現望亡軍并請阿那瓌十月錄

尚書事高陽王雍尚書令李崇侍中侯剛尚書左僕射
元欽侍中元乂侍中安豐王延明吏部尚書元修義尚
書李彥給事黃門侍郎元纂給事黃門侍郎張烈給事
黃門侍郎盧同等奏曰竊聞漢立南北單於晉有東西
之稱皆所以相維禦難為國藩籬今臣等叅議以為懷
朔鎮北土名無結山吐若奚泉燉煌北西海郡即漢晉
舊鄣二處寬平原野彌沃阿那瓌宜置西吐若奚泉婆
羅門宜置西海郡各令總率部落收離聚散其爵號及

資給所須唯恩裁處彼臣下之官任其舊俗阿那瓌所
居既是境外宜少優遣以示威刑請沃野懷朔武川鎮
各遣二百人令當鎮軍主監卒給其糧伏送至前所仍
為其造構功就聽還諸於北來在婆羅門前投化者令
州鎮上佐准程給糧送詣懷朔阿那瓌鎮與使人量給
倉廩在京館者任其去留阿那瓌草創先無儲積請給
朔州麻子乾飯二千斛官駝運送婆羅門居西海既是
境內資衛不得同之阿那瓌等新造藩屏宜各遣使持

節馳驛先詣慰喻并委經畧孝明從之十二月詔安西將軍廷尉元洪超兼尚書行臺詣燉煌安羅婆羅門婆羅門尋與部衆謀叛投噉達噉達三妻皆婆羅門姊妹仍為州軍所討擒之三年十二月阿那瓌表乞粟為田種詔給萬石阿那瓌衆大饑入塞寇掠孝明詔尚書左丞元孚兼行臺尚書持節喻之孚見阿那瓌為其所執以孚自隨驅掠良口二千并公私驛馬牛羊數十萬北適謝孚放還詔驃騎大將軍尚書令李崇等率騎十萬

討之出塞三千餘里至瀚海不及而還俟匿伐至洛陽
孝明臨西臺引見之五年婆羅門死於洛陽之館詔贈
使持節鎮西大將軍秦州刺史廣牧公是歲沃野鎮人
六韓拔陵及諸鎮相應孝昌元年春阿那瓌率衆討之
詔遣牒云具仁齋雜物勞賜阿那瓌阿那瓌拜受詔命
勒衆十萬從武川鎮西河沃野頻戰克捷四月孝明又
遣通直散騎常侍中書舍人馮雋使阿那瓌宣勞班賜
有差阿那瓌部落既和士馬稍盛乃號救連頭兵豆伐

可汗魏言把攬也十月阿那瓌復遣郁久彌彌娥等朝貢三年四月阿那瓌遣使人鞏鳳景等朝貢及還孝明詔之曰北鎮羣狄為逆不息柔然主為國立忠助加誅討言念誠心無忘寢食今知停在朔垂與爾朱榮隣接其嚴勒部曲勿相暴掠久近得蠕蠕主啟更欲為國東討但世居北漠不宜炎夏今可且停聽待後敕蓋朝廷慮其反復也此後頻使朝貢

迦藍記曰北夷酋長遣子入侍者常秋來春去避中

國暑熱時謂雁臣

建義初孝莊詔曰夫勲高者賞重德厚者名隆蠕蠕主
阿那瓌鎮衛北藩禦侮朔表使陰山息警弱水無塵刊
跡狼山銘功瀚海至誠既篤勲緒莫酬故宜樹以殊禮
何容格以恆式自今以後讚拜不言名上書不稱臣太
昌元年六月阿那瓌遣烏勾蘭樹升伐等朝貢并為長
子請尚公主永熙二年四月孝武詔以范陽王誨長女
瑯琊公主許之未及成婚帝入關東西魏競結阿那瓌

為婚好西魏文帝以孝武時舍人元翌女為化政公主
妻阿那瓌兄弟塔寒又自納阿那瓌女為后加以金帛
誘之阿那瓌遂留東魏使元整不報信命後率眾渡河
以廢后乙弗氏為言文帝不得已敕廢后自殺元象元
年五月阿那瓌掠幽州范陽南至易水九月又掠肆州
秀容至於三堆又殺元整轉謀侵害東魏乃囚阿那瓌
使溫豆拔等

魏內入諸姓嗚盆氏孝文改溫氏

神武以阿那瓌克拔將撫懷之乃遣其使人龍無駒北
還以通溫豆拔等音問始阿那瓌殺元整亦謂溫豆拔
等不存既見無駒微懷感愧興和二年春復遣龍無駒
等朝貢東魏然猶未款誠阿那瓌女妻文帝為后者遇
疾崩齊神武因遣相府功曹參軍張徽募使於阿那瓌
間說之曰寶炬黑獺既殺孝武又殺阿那瓌女妾以疎
屬假公主嫁彼為親又阿瓌渡河西討時黑獺燒草
使馬饑不得南進此其逆詐難信之狀又論東魏正統

所在且言其住者破亡歸命魏朝幸賴保護得存其國
兼詐阿那瓌云近有赤鋪部落堅胡行於河西為柔然
主所獲云柔然主問之汝從高王為從黑獺一人言從
黑獺柔然主殺之二人言從高王柔然主放遣此即柔
然主心存大國以彼女見害欺詐相待不仁不信宜所
深仇且其守逆一方朝廷亦欲加誅彼若深念舊恩欲
存和睦當奏天子以懿親公主結姻更遣兵將伐彼叛
臣為柔然主雪耻執惡徽纂既申神武意阿那瓌乃召

大臣與議歸誠東魏遣其侯利莫何莫緣游大力等朝
貢因為其子菴羅辰請婚好靜詔兼散騎常侍太府卿
羅念兼通直散騎常侍中書舍人穆景相等使於阿那
瓌八月阿那瓌遣莫何去折豆渾十斤等朝貢因求婚
神武請遂其意用招四遠詔以常山王隲妹樂安公主
許之改封蘭陵郡長公主十二月阿那瓌復遣折豆渾
十斤詣東魏請婚三年四月阿那瓌遣吐豆登郁久閭
譬渾侯利莫何折豆渾侯煩等奉馬千匹為聘禮請迎

公主詔遣宗正卿元壽兼太常卿孟韶等送公主自晉陽北邁資用器物神武親自經紀咸出豐渥阿那瓌遣其吐豆登郁久閭匿伏俟利阿夷普握蒲提棄之伏等迎公主於新城之南六月神武慮阿那瓌難信又以國事加重躬送公主於樓煩之北接勞其使每皆隆厚阿那瓌大喜自是朝貢東魏相尋四年阿那瓌請以其孫女號隣和公主妻齊神武第九子長廣公湛孝靜詔許為婚阿那瓌遣其吐豆登郁久閭譬掘俟利莫何游大

力送女於晉陽武定四年阿那瓌有愛女號公主以神
武威德日盛又請致之孝靜聞而詔神武納之阿那瓌
遣其吐豆登郁久閭汗拔姻姬等送女於晉陽自此東
魏邊塞無事至武定末使貢相尋始阿那瓌初復其國
盡禮朝廷孝明後中原喪亂未能外畧阿那瓌統率此
方頗為彊盛稍敢驕大禮敬頗闕遣使朝貢不復稱臣
天平以來逾自踞慢汝陽王暹為秦州遣其典籤齊人
淳於暉使於阿那瓌遂留之親寵任事阿那瓌因入洛

陽心慕中國立官號借擬王者遂有侍中黃門之屬以
單為秘書監黃門郎掌其文墨單教阿那瓌不遜每奉
圖書隣敵抗禮及齊受東魏禪亦歲時往來不絕天保
三年阿那瓌為突厥所破自殺其太子菴羅辰及瓌從
弟登注俟利登注子庫提並擁眾奔齊餘眾立注次子
鐵伐為主四年齊文宣送登注及子庫提還北鐵伐尋
為契丹所殺國人仍立登注為主又為大人阿富提等
所殺國人復立庫提為主是歲復為突厥所攻舉國奔

齊齊文宣乃北討突厥迎納柔然廢其主庫提立阿那
瓌子菴羅辰為主致之馬邑川給其廩餼繒帛親追突
厥於朔方突厥請降許之而還柔然貢獻不絕五年三
月菴羅辰叛文宣親討大破之菴羅辰父子北遁四月
寇肆州帝自晉陽討之至恒黃州瓜堆虜散走時大軍
已還帝麾下千餘騎遇柔然別部數萬四面圍逼帝神
色自若指畫形勢虜衆披靡遂縱兵潰圍而出虜退走
追擊之伏尸二十五里獲菴羅辰妻子及生口三萬餘

人五月帝又北討柔然大破之六月柔然帥部衆東徙將南侵帝帥輕騎邀擊金川柔然聞而遠遁

冊府元龜曰王峻刺史營州柔然主菴羅辰帥其餘黨東徙峻度其必來預為備未幾果到頓軍城西峻設奇伏兵大破之獲其名王數十人菴羅辰遁

六年六月文宣又親討柔然七月帝頓白道留輜重親率輕騎五千追柔然躬犯矢石頻大破之遂至沃野大獲而還是時柔然累為突厥所破以西魏恭帝二年遂

率部落千餘家奔關中突厥既恃兵彊又籍西魏和好
恐其遺累依憑大國使驛相繼諸盡殺以甘心周文議
許之遂收縛柔然主以下三千餘人付突厥斬之青門
外中男以下免並配王公家

愚按北史柔然後有匈奴宇文莫槐即後有遠祖又
有徒河段就六眷皆晉時之事與魏無涉今照劉淵
石勒例削之

高車古赤狄餘種初號為狄歷北方以為救勒諸夏以

為高車丁零其語畧與匈奴同而時有小異或云其先
匈奴甥也其種有狄氏表紇氏斛律氏解批氏

魏內入諸姓有解批氏孝文改解氏

護骨氏異奇斤氏無都統大帥當種各有君長性麤猛
黨類同心至於寇難翕然相依關無行陣頭別衝突乍
出乍入不能堅戰其俗蹲踞裂贖無所忌避婚姻用牛
馬納聘為榮結言既定男黨營車闌馬令女黨恣取上
馬袒乘出闌馬主立闌外振手驚馬不墜者即取之墜

則更取數滿乃止俗無穀不作酒迎婦日男女相將持
馬酪熟肉節解主人延賓亦無行位穹廬前叢坐飲宴
終日復留共宿明日將婦歸既而夫黨還入其家馬羣
取良馬父母兄弟雖惜終無言者頗諱取寡婦而優憐
之其畜產自有記識雖闌從在野終無妄取俗不清潔
喜致震霆每震則叫呼射天而葉之移去至來歲秋馬
肥復相率僕於震所埋殺羊燃火拔刀女巫祝說似如
中國被除而羣隊馳馬旋繞百匝乃止人持一束柳棖

回豎之以乳酪灌馬婦人以皮裹羊骸戴之首上縈屈
髮鬚而綴之有似軒冕其死亡葬送掘地作坎坐尸於
中張臂引弓佩刀挾稍無異於生而露坎不掩時有震
死及疫癘則為之祈福若安全無他則為報賽多殺雜
畜焚骨以燎走馬遠旋多者數百匝男女無大小皆集
會平吉之人則歌舞作樂死喪之家則悲吟哭泣其遷
徙隨水草衣皮食肉牛羊畜產盡與柔然同唯車輪高
大輻數至多後徙於鹿渾海西北百餘里部落彊大帝

與柔然為敵亦每侵盜與魏魏道武襲之大破其諸部
後道武復度弱洛水西行至鹿渾海停駕簡輕騎西北
行百餘里襲破之虜獲生口牛馬羊二十餘萬復討其
餘種於狼山大破之車駕巡幸分命諸將為東西二道
道武親勒六軍從中道自駁髡水西北徇畧其部諸軍
同時雲合破其雜種三十餘落衛王儀別督諸將從西
北絕漠千餘里復破其遺迸七部高道大懼諸部震駭
道武自牛川南引大校獵以高車為圍騎徒遮列周七

百餘里聚雜獸於其中因驅至平城即以高車衆起鹿苑南因臺陰北距長城東包白登屬之西山尋高車徑利曷莫弗敕力健率其九百餘落內附拜敕健為揚威將軍置司馬叅軍賜穀二萬斛後高車解批莫弗幡亘建復率其部三十餘落內附亦拜為威遠將軍置司馬叅軍賜衣服歲給廩食柔然社論破之後收拾部落轉徙廣漠之北侵入高車地斛律部帥倍侯利患之曰社論新集兵貧馬少易與耳乃舉衆掩擊入其國落高車

昧利不顧後患分其廬室妻其婦女安息寢卧不起社
嶠登高望見乃招集亡散得千人晨掩殺之走脫者十
二三倍侯利遂奔魏賜爵孟都公侯利質直勇健過人
奮戈陷陣有異於衆北方人畏之嬰兒啼者語曰倍侯
利來便止處女歌謠云求良夫當如倍侯其服衆如此
善用五十箸筮吉凶每中故得親幸賞賜豐厚命其少
子曷堂內侍及倍侯利卒道武悼惜葬以魏禮謚忠壯
王後詔將軍伊謂帥二萬騎北襲高車餘種袁紇烏頻

破之道武分散諸部唯高車以類麤獷不任使役故得別為部落後太武征柔然破之而還至漠南聞高車東部在已尼陂民畜甚衆去官軍千餘里將遣左僕射安原等討之司徒長孫翰尚書令劉潔等諫不聽乃遣原等并發新附高車合萬騎至已尼陂高車諸部望軍降者數十萬落獲馬牛羊百餘萬皆徙至漠南千里之地乘高車俗逐水草畜牧蕃息數年後漸知粒食歲致貢獻國家馬及牛羊遂至於賤氈皮委積文成時五部高

車合聚祭天衆至數萬大會走馬殺牲游遶歌吟欣欣
其俗稱自前世以來無盛於此會車駕臨幸莫不欣悅
後孝文召高車之衆隨駕南討高車不願南行遂推表
紇樹者為主相率北叛游踐金陵都督宇文福追討大
敗而還又詔平北將軍江陽王繼為都督討之繼先遣
人慰勞樹者樹者尋悔相率降高車之族又有十二姓
一曰泣伏利氏二曰吐盧氏三曰乙旃氏

魏書氏族志稱獻帝以叔父之胤為乙旃氏孝文改

叔孫氏此又一山旃邪

四曰大連氏五曰窟賀氏六曰達薄干氏七曰阿崦氏
八曰莫允氏九曰俟分氏十曰副伏羅氏十一曰乞袁
氏十二曰方叔沛氏先是副伏羅部為柔然所役屬豆
崦之世柔然亂離國部分散副伏羅阿伏至羅與從弟
窮奇俱統領高車之衆十餘萬落太和十一年豆崦犯
塞阿伏至羅固諫不從怒率所部之衆西叛至前部西
北自立為王國人號之曰侯婁劄勒猶魏言大天子也

窮奇號侯倍猶魏儲主也二人和穆分部而立阿伏至羅居北窮奇在南豆倫追討之頻為阿伏至羅所敗乃引衆東徙十四年阿伏至羅遣商胡越者至京師以二箭奉貢云蠕蠕為天子賊臣諫之不從來此自立當為天子討除蠕蠕孝文未信遣使者於提佳觀虛虛阿伏至羅與窮奇遣使者薄頡隨提來朝貢其方物詔員外散騎侍郎可足渾長生復與於提使高車賜繡袴褶一具雜綵百匹窮奇後為噉達所殺虜其子彌俄突等其

衆分散或來奔附或投柔然詔遣宣威將軍羽林監孟威撫納降人置之高平鎮阿伏至羅長子丞阿伏至羅餘妻謀害阿伏至羅阿伏至羅殺之阿伏至羅又殘暴大失衆心衆共殺之立其宗人跋利延為主歲餘嚙噠伐高車將納彌俄突國人殺跋利延迎彌俄突立之彌俄突既立復遣朝貢又表奉獻金方一銀方一金杖二馬七匹駝十頭詔使者慕容坦賜彌俄突雜綵六十匹宣武詔之曰卿遠據沙外頻申誠款覽揖忠志特所欽

嘉蠕蠕噉吐谷渾所以交通者皆路由高昌犄角相接今高昌內附遣使迎引蠕蠕往來路絕姦勢不得妄今羣小敢有陵犯擁塞王人罪在不赦彌俄突尋與柔然王伏圖戰於蒲類海北為伏圖所敗西走三百餘里伏圖次於伊吾北山先是高昌王麴嘉表求內徙宣武遣孟威迎之至伊吾柔然見威軍怖而遁彌俄突聞其離駭追擊大破之殺伏圖於蒲類海北割其髮送威又遣使獻龍馬五匹金銀貂皮及諸方物詔東城子於亮

報之賜樂器一部樂工八十人赤紬十疋綵綵六十匹
彌俄突遣其莫何去汾屋引叱賀真貢其方物孝明初
彌俄突與柔然主醜奴戰敗被擒醜奴繫其兩足於駕
馬上頓曳殺之漆其頭為飲器其部衆悉入嚙達經數
年嚙達聽彌俄突弟伊訶還國伊訶既還國遣使奉表
詔遣使者谷楷等拜為鎮西將軍西海郡開國公高車
王伊訶復大破柔然其主婁羅門走投掠州正光中伊
訶遣使朝貢因乞朱畫步挽一乘并慢褥鞞鞞一副織

扇各一枚青曲蓋五枚赤漆扇五枚鼓角十枚詔給之
伊訶後與柔然戰敗歸其弟越居越居殺伊訶自立天
平中越居復為柔然所破伊訶子比適復殺越居自立
興和中比適又為柔然所破越居子去賓自柔然奔東
魏齊神武欲招納遠人上言封去賓為高車王拜安北
將軍肆州刺史既而病死初道武時有吐突隣部在女
水上常與解如部相為唇齒不供職事登國三年道武
西征度弱洛水復西行趣其國至女水上討解如部落

破之明年春盡畧徙其部落畜產而還又有紇突隣與
紇奚世同部落而各有大人長帥擁集種類常為寇如
意辛山登國五年道武勒衆親討慕容麟率衆來會大
破之紇突隣大人屋地韃紇奚大人庫寒等皆舉部歸
降始皇二年駕伐中山軍於栢肆慕容寶夜來攻營軍
人驚走還於國路由并州遂反將攻晉陽并州刺史元
延討平之紇突隣部帥匿物尼紇奚部帥叱奴根等復
聚黨反於陰館南安公元順討之不克死者數千人道

武聞之遣安遠將軍庾岳還討匿物尼等殄之又有一侯
呂隣部衆萬餘口常依嶮畜牧登國中其大人叱伐為
寇於苦水河八年夏道武大破之并擒其別帥焉古延
等薛於部常屯聚於三城間及滅衛辰後其步帥太息
伏望軍歸順道武撫安之駕還衛辰子勃勃奔其部道
武聞之使使詔太悉伏執送之太悉伏出勃勃示使者
曰今窮而見投寧與俱亡何忍送之遂不遣

十六國春秋薛干部作叱于中載太悉伏即他斗伏

者懼魏見責欲送勃勃而其兄子阿利諫止之太悉
伏不從阿利潛遣人篡取於路送之姚興非太悉伏
意也與此不同

道武大怒親討之會太悉伏先出擊曹覆寅官軍乘虛
遂屠其城獲太悉伏妻子珍寶徙其人而還太悉伏來
赴不及遂奔姚興未幾亡歸嶺北上郡以西諸鮮果雜
胡聞而皆應之天賜五年勃勃盡剽掠揔服之

十六國春秋載勃勃僭王時以叱干阿利為御史大

夫封梁公或以酬恩也蓋見與太悉伏無涉

及平統萬薛干種類皆得為編戶矣而率屯山鮮卑別
種破多蘭部世傳主部落至木易干有武力壯勇劫掠
左右西及金城東侵安定數年間諸種患之天興四年
遣常山王遵赴高平討之木易干將數千騎素國遁盡
徙其人於京師餘衆分迸其後為赫連勃勃所滅又黜
弗素古延等諸部富而不恭天興五年材官將軍和突
率六千騎悉獲之又越勒倍尼部永興五年轉牧跋那

山西七月遣奚斤討破之徙其人而還

論曰周之獫狁漢之匈奴其作害中國故久矣魏晉之世種族瓜分去來沙漠之陞窺擾鄯塞之際猶皆東胡緒餘冒頰枝葉至如柔然者匈奴之裔根本莫尋逃形集醜自小為大風馳鳥赴倏來忽往代京為屢駭戎車所以不寧是故魏氏祖宗揚威耀武驅其畜產收其部落剪之窮髮之野逐之無人之鄉豈好肆兵極銳凶器不戢蓋亦急病除惡事不得已其狡狴彊弱之由猾虜

叛服之迹故備錄云

南北史合注卷一百八十八